



# Nunanut allanut politikkikkut najummatsisimanartorsiorfiup massakut pisup kingunerisaanik Kalaallit Nunaanni eqqarsartaatsikkut peqqissuseq aamma atugarissaarneq.

## PAASSISSUTISSANIK PINGAARNERSIUINEQ

Nunanut allanut politikkikkut massakut pisut Kalaallit Nunaanni innuttaasunut annertuumik sunniuteqartut misissuinerup takutippaa. Nunamik tigusinissamik amerikap præsidentiata oqaaseqaatigisartagai maannakkorpiaq ernumanermik aamma toqqissisimannginnermik pilersitsillunilu eqqarsartaatsikkut peqqissutsimut aamma atugarissaarnermut sunniuteqarpoq. Inuunerup pitsaassusia siusinnerusumut sanilliullugu massakkorpiaq malunnaatilimmik appasinnerusooq misissuinermi takuneqarpoq, aammattaaq 2018-imut sanilliullugu 2025-mi eqqarsartaatsimikkut atugarliuuteqarnermut ersiutinik arlaqarnerusunik takutitsillutik. Misissuinermut peqataasut namminneq aamma nunap isumannaatsuutinneqarnissaanik, aamma meeqqat siunissaannik ernumassuteqarnerminnik, aamma pisut ilaanni nuna qimassallugu eqqarsaateqarsimallutik nassuiaapput. Amerlasuut eqqarsartaatsimikkut aamma timimikkut ersiutinik, soorlu aarlerissuteqarnermik, sinnarlunermik, nikallunganermik, eqqissisimannginnermik aamma aallussisinnaannginnermik misigisaqarsimapput. Eqqissisarniarlutik ilaquttaminnut aamma ikinngutiminnut tapersersortissarsiorput, pinngortitaq, upperisaq imaluunniit sammisaqarnerit soorlu nuersaaneq imaluunniit timigissarneq atortarlugit, aamma imminnut illersorniarlutik nutaarsiassanik aamma nittartakkatigut inuit attaveqaqatigiittarfiinik atuinertik killilersortarsimallugit.

Misissuineq apeqqutinik akisassanik online-kkut akissuteqarfigineqartunik, pingaarnertut nittartakkatigut inuit attaveqaqatigiittarfii aqqutigalugit ulluni 28. januaari 2026-miit 16. februaari 2026-mut siammarteqartunik, tunngaveqarpoq. Kalaallit Nunaat pillugu akerleriissuteqarneq januaarip qiteqqunnerani malunnaatilimmik sakkortusivoq, ilaatigut kalaallit, danskit aamma amerikamiut aallartitaasa akornanni ataatsimiinnerit tamanit oqallisaasorujussuit, kiisalu USA-p tungaaninngaanniit akitsuusiinissamik aarlerisaarinerit aqqutigalugit aningaasaqarnikkut tatisineq aqqutigalugit. Soqutiginninneq Davosimi World Economic Forumip ingerlanneqarnerani ulloq 21. januaari 2026-mi sakkortunerulerpoq, tassani illersornissakkut politikki pissutigalugu Kalaallit Nunaannik aqutsinissaq pisariaqartutut amerikap præsidentiata aalajangiusimammagu, ilutigitilluguli sakkulersornikkut pissaanermik atuinissaq tunuartillugu. Piffissami, apeqqutit akisassat akissuteqarfigineqarsinnaanerisa ingerlanneqarneranni, nunani tamalaani tusagassiorfiit sakkortuumik sammininnerat ingerlaqqippoq, inuiaqatigiinnilu ingerlaavartumik tatineqarneq aamma nalornineq amerlasuunit misigineqarluni.

Apeqqutit akisassat nunap inissisimaneranut, suaassutsimut aamma ukiunut tunngatillugu siammasissumik siammarterneqarput. Akissutit amerlanerpaartaat Nuuminngaanneersuupput, tamannalu inuiaqatigiit agguataarsimanerannik aamma nunani tamalaani akerleriissuteqarnermut qaninnerusutut misigisimanissamut periarfissaqarneruneranik takutitsivoq, nunanit tamalaanit tikeraarneqarnerit aamma politikkikkut aalajangiisarnerit illoqarfiit pingaarnersaanni amerlasuutigut pisarnerat pissutigalugu. Taamaattoq misissuineq kommuninit tamanit, aamma sumiiffinnit mikinerusunit amerlasuunit peqataaffigineqarpoq.

## 76 %-it

Amerikap præsidentiata Kalaallit Nunaannik tigusiariarluni oqaaseqaatai pissutigalugit ernumaneq akunnattumik imaluunniit annertuumik misigisimallugu akissuteqarput.

Inuiaqatigiit akornanni ernumaneq annertunerusumik ima nassuiarneqarsinnaavoq :

24%-it annikitsumik ernumassuteqarlutik imaluunniit ernumassuteqarsimanatik misigisimapput, 19%-it akunnattumik annertussusilimmik ernumallutik oqaatigalugu.

57%-it amerikami præsidentip Kalaallit Nunaannik tigusiariarluni oqaaseqaatai pissutigalugit annertuumik qaffasissusilimmik ernumaneq misigisimavaat.

## 82%-it

Amerikap præsidentiata oqaaseqaatai pissutigalugit ernumassuteqarnerminik ulluinnarni sunnersimaneqarput.

Taakkunannga 48%-it aarlerillutik, aamma 30%-it unnuami sinnarluttarlutik oqaatigivaat.

Taamatutaaq 32%-it amerikami præsidentip oqaaseqaatai pissutigalugit annilaangallutik akissuteqarput.

29%-it amerikap præsidentiata Kalaallit Nunaannik tigusiariarluni oqaaseqaatai pissutigalugit ernumanerminni kamaammianerulerlutik sunnersimagaatik misigisimapput, aamma 47%-it siunissartik pillugu pilersaarusiornissartik ajornakusoortillugu.

## 64%-it


Inuunermik pitsaassusia massakkorpiaq qaffasissuusoq oqaatigivaat. Tamanna 2018-imi 77%-iniit aamma 2025-mi 84%-iniit appariaateqarfiuvoq.

Misissueqqissaarnerni misissuinerit akornanni suaassutsit, ukiut aamma nunap immikkoortuini sumiiffiit assigiinngissutaat eqqumaffigineqarput.

## 31%-it

Eqqarsartaatsikkut massakkorpiaq atugarliuuteqarnermut ersiutinik takutitsipput. Tamanna 2018-imi 9%-iniit aamma 2025-mi 7%-iniit qaffariaateqarfiuvoq.

Misissueqqissaarnerni misissuinerit akornanni suaassutsit, ukiut aamma nunap immikkoortuini sumiiffiit assigiinngissutaat eqqumaffigineqarput.



# Amerikap præsidentiata oqaaseqaataasa ernumatitsineri ulluinnarni ilinnut qanoq sunniuteqartarpat?

Misissueqqissaarnikkut nassuiaatit aamma peqataasut  
ammasumik akissutaannit issuaanerit.

Amerikami præsidentip oqaaseqaataasa  
ernumatitsineranut tunngatillugu  
apeqqummik akissuteqartut  
amerlanerpaartaasa nassuiarpaat  
ernumallutik – imaluunniit  
ernumasimallutik – naak ernumassutaasa  
qaffassisussiat allanngoraraluartoq.

"Meeqqama siunissaat  
ernumassutigivara."

"Kalaallit Nunaanni  
siunissaqarnerlunga  
isumaliutigivara"

Innuttaasut arlallit pingaarnertut  
amerikami præsidentimut,  
vicepræsidentimut aamma  
ataatsimut isigalugu USA-mut  
kamannertik,  
kamaammiusseqqanertik aamma  
pakatsinertik oqaatigivaat.  
Amerikap tungaaninngaanniit  
oqaatigineqaqattaartut  
soqutigittaannertut misigisimavaat,  
aammalu namminneq isummatik  
pimoorullugit tiguneqanngitsut  
takutitsisuunerarlugit.

Kalaallit Nunaat kisimiinngitsoq  
tunngaviusumik upperalugu innuttaasut  
ataasiakkaat aamma oqaatigivaat.  
Upperinninneq taanna pingaartumik nunap  
EU-mit tapersorsorneqarneranik  
paasinninnermik, kiisalu danskit  
kunngearfiannut ilaanermut  
atassuteqarpoq. "EU-mit  
tapersorsorneqarnerput, aamma  
qujanartumik danskit kunngearfiannut  
ilaagatta."

USA-lli præsidentiata Kalaallit Nunaat  
pigerusullugu imaluunniit tigorussullugu  
oqaaseqaataanut tunngatillugu  
ernumassuteqarnatik ataasiakkaat  
erseqqissarpaat, tamatumunnga  
inerteqqutaasumik inatsiseqarnera  
innersuussutigalugu. "Taamaaliussappat  
[amerikami præsidenti][Kalaallit Nunaat  
tigullugu] inatsisinik unioqqutitsissasoq  
saammarsaatigivara, tamannalu  
taassumunnga pitsaanngitsumik  
kinguneqassaaaq, taamaattumillu  
pisinnaanani."

"Naakkut anniarpunga."  
"Qasujuaannavillungalu  
nikallungajuaannavippunga."

"Aallussisinnanermik  
ajornartorsiuteqarneq [misigivara],  
oqarasuaatima iperarnissaa  
ajornakusoortippara, nutaarsiassat  
akulikitsumik alaatsinaattarpakka."

Amerlanerilli ernumanermik, aamma  
ataatsimut isigalugu  
toqqissisimanninnermik aamma  
annilaanganermik misigisimanertik  
oqaatigivaat. Innuttaasut arlallit  
namminneq isumannaatsumik  
inissisimanissartik ernumassutigalugu,  
aamma siunissaq qanoq  
nassataqarsinnaanersoq nalornissutigalugu  
nassuiaapput. Arlallit peratarsinnaasunik  
assigiinngitsunik takorluusimallutik  
oqaluttuarput, isumaliutillu tamakku  
toqqissisimanninnermik pilersitsisimapput  
– minnerunngitsumik ilaquuttaminnut  
qaniginerpaasaminnut tunngatillugu.

"[Amerikami  
præsidenti] aamma  
[amerikami  
præsidentip tullia]  
aamma USA  
kamaappakka."



# Ernumagaangavit imminut qanoq paarisarpit?

Misissueqqissaarnikkut nassuiaatit aamma peqataasut ammasumik akissutaannit issuaanerit.

""Ernumassutinnut tunngasut pillugit ilaquttakka qaniginerpaasakka oqaloqatigisarpakka."

"Guutimut qinusarpunga."

Amerlasuut tusagassiuutitigut ingerlaavartumik tusarliussiuarnerit, aamma nunani allani politikikkut pisut pillugit ernumassutit pilersinneqartut ingalassimaniarlugit pinngortitaliartarsimallutik nassuiaapput. Peqataasut ilaat kisimiillutik, imaluunniit ilaqattatik ikinngutitilluunniit ilagalugit qaqqamut angalaartarsimapput, imaluunniit pinngortitami isorartuumut pisuttuartaarsimallutik. "Pitsaasumik siunertalimmik suliaqartarpunga, pinngortitami pisuttuartaarpunga"

Amerlasuut nutaarsiassat imaaginnavissut namminerminnut killilersimaartinnerisigut imminnut paariniarsarisimallutik oqaluttuarput. Arlallit eqqarsartaatsimikkut peqqissusertik qajassuunniarlugu oqarasuaat ingalassimatittariaqarsimallugu, aammalu nutaarsiassanik atuarnaveersaartarsimallutik nassuiaapput.

"Nutaarsiassat ullormut arlaleriarujussuarlunga atuartaarpakka. Taamaaliornaveersaaral uarama, kisianni ingalassimaniarnissai ajornakusoorsimavoq."

"Silaqassaangitsuliorner mik unitsitsisussanik isumaliutiginnilluarsinnaa sunik inoqartoq eqqarsaatigivara."

Inuit, apeqqutinik akisassanik akissuteqartut amerlanerpaartaasa pisumi najummatsisimanartorsiorfiusumi imminnut aamma ilaquttatik paariniarsarisimallugit nassuiaapput. Periutsit assigiinngitsut, ulluinnarminni eqqissisimanissamik aamma toqqissisimanissamik pilersitsinissamik siunertallit erseqqissaatigineqarput. Pingaartumik ilaquttanut, ikinngutitut aamm suleqatinut atassuteqarfiit saqqummerput, amerlasuullu aamma erseqqissarpaat ataatsimoornerit aamma oqaloqatigiinnerit pingaaruteqarsimasut.

Amerlasuut "allanik eqqarsaateqarnissaq" periuserisimavaat, tamannalu amerlasuutigut massakkumiinnissamut tunngassuteqartarsimavoq, assersuutigalugu pinngortitami pisuttuarnerup nalaani. Eqqarsaatit allamut saasarnissaannut periutsit assigiinngitsut allanit eqqaaneqarput, soorlu eqqarsaatit nuannersut, eqqarsaqqissaarluni imminut naalaarneq, nuersaaneq imaluunniit timigissarneq.

"Nittartakkatigut inuit attaveqatigiittarfiini k atuisarnera unitsikkallarpara, aammalu notifikationit malinnaaffigisakkalu allanngortillugit."



# Misissuinnermut kikkut peqataappat?

Misissuinnermut inuit 308-t peqataapput

Arnat 60%-it aamma angutit 40%-it missaanniittut

Angut 38%

Alla 0,6%

Arnaq 62%

16-inik ukiulik

Peqataasuni nukarlerpaaq

77-nik ukiulik

Peqataasuni ukioqqortunerpaaq

Peqataasut agguaqatigiissillug u 48-nik ukioqarput

Misissuinnermi kommunini tamani aamma illoqarfinni tamani peqataasut ilanngunneqarput. Sumiiffinnit mikinerusunit arlalinnit aammattaaq peqataasoqarpoq

6%

Avannaata Kommunua

6%

Kommune Qeqertalik

11%

Qeqqata Kommunua

70%

Kommuneqarfik Sermersooq

7%

Kommune Kujalleq



# Misissuineq pillugu

Misissuineq una Kalaallit Nunaannut tunngatillugu nunani allani politikikkut massakut pisut inuiaqatigiit kalaallit eqqarsartaatsimikkut peqqissusiannut aamma atugarissaarnerannut qanoq sunniuteqarsimanersoq takutinniarlugu suliarineqarpoq. Piffissami nunanit tamalaanit annertuumik sammineqarfiusumi, Kalaallit Nunaata amerikamit aqunneqalernissaanik periarfissamik politikikkut oqariartuuteqarfiusumi aamma USA-p, Kalaallit Nunaata aamma Danmarkip akornanni attaveqarnikkut akerleriissuteqarnerup annertusiartuinnarfiani siunissamut tunngatillugu nalornineq ernumanerlu innuttaasut amerlasuut migisigisimavaat. Taamaattumik pisoq immikkut ittoq tamanna innuttaasut eqqarsartaatsimikkut peqqissusiannut qanoq sunniuteqarnersoq misissuinermi nutartikkamik aamma assigiinngissitaartumik takutitsiffiusumik takutinniarneqarpoq.

Misissuineq misissuiffiqarsinnaasut tamakkiisut ilaannik misissuineq tunngavigalugu online-kkut apeqqutit akisassat atorlugit kalaallisut aamma danskisut ingerlanneqarpoq. Apeqqutit akisassat atorlugit misissuineq Innuttaasut peqqissusiannik misissuineq 2024–2026-mut[1] ilassutitut misissuineruvoq. Misissuinermi siunnerfigineqartut tassaapput inuit Kalaallit Nunaanni najugallit 15-iniit qummut ukiullit, 1. januaari 2026-mi[2] katillugit 45.430-usut, tamaasa.

Apeqqutit akisassat Innuttaasut peqqissusiannik misissuineq 2024–2026-mi atortut pioreersut aamma misilerarneqarluarsimasut aallaavigalugit ineriartortinneqarput. Uttortaanermut atortut ilisimatusarnikkut qaffasissumik pitsaassusillit, paasiuminartut aamma piffissap sivilisinerup ingerlanerani sanilliunneqarsinnaasut atornerqarnissaat pingaartinneqarpoq. Atortut toqqarneqartut tassaapput Kessler-6, eqqarsartaatsikkut atugarliornermik uuttortaanermut atornerqartartoq, aamma Cantril's Ladder, inooriaatsimik iluarisimaarinninnermik nammineq naliliinermik uuttortaanermut atornerqartartoq. Nunani allani politikikkut pisunut tunngatillugu ernumassutit ersersinniarlugit ernumanerup qaffasissusianut, ernumassutit ulluinnarni inuunermut qanoq sunniuteqarnerisut, aamma akissuteqartoq ernumanermini imminut qanoq paarisarnersoq pillugit ilassutitut apeqqutit pingasut ineriartortinneqarput. Tamatuma saniatigut misissuineqarsarnerit agguataarneqarsinnaanissaat anguniarlugu ukiut, suaassuseq, sumiiffik aamma ilinniarsimassuseq pillugit paasissutissat katersorneqarput.

Apeqqutit akisassat pitsaassusiat aamma oqaatsitigut erseqqissuunissaat qulakkeerniarlugit suleqatinut, kalaallisut danskisullu piginnaasalinnut, aallarnisaataasumik misileraqqaarneqarput. Apeqqutit akisassat aammattaaq Innuttaasut peqqissusiannik misissuinermit malinnaatitanit, naalaakkersuisoqarfinit arlalinnit, aqutsisoqarfinit, NGO-init aamma peqqinnissaqarfimmit peqataatitaqartunik inuttalimmit, misissoqqissaarneqarput. Naleqqussusiata aamma paasiuminassusiata nalilersorneqarneranik malinnaatitat tapertaapput.

Online-kkut apeqqutit akisassat linki aamma QR-kode-t aqutugalugit peqataasunit iserfigineqarsinnaapput. Misissuineq ulloq 28. januaari 2026 saqqummiunneqarpoq, apeqqutillu akisassat ulloq 16. februaari 2026-p tungaanut ammatinneqarlutik. Misissuineq pillugu paasissutissiinermut atortut aamma saqqummiussinerit kalaallit, danskit aamma tuluit oqaasii atorlugit suliarineqarput. Peqataasussarsiorneq online-kkut, aamma nittartakkatigut inuit attaveqatigiittarfii pingaarnertut aqutugalugit ingerlanneqarpoq, saqqummiussat Innuttaasut Peqqissusiannik Ilisimatusarfiup quppernera, sumiiffinni quppernerit, kommunit qupperneri aamma suliaqartut allat qupperneri aqutugalugit siammarterneqarlutik. Tamatuma saniatigut inuusuttut peqataanissaat angusinnaajumallugu ilinniarfeqarfiit attaveqarfigineqarput, aammalu misissuineq pillugu paasissutissat nanoq.gl [EJ1] aamma Ilisimatusarfiup nittartagaa aqutugalugit saqqummiunneqarlutik. Tamatuma saniatigut ullormi misissuinerup saqqummiunneqarfiani tusagassiutinut nalunaaruteqartoqarpoq, apeqqutinut akisassanut linki aamma QR-kode ilanngullugit misissuineq pillugu paasissutissat nuna tamakkerlugu tusagassiutit Sermitsiaq aamma KNR aqutugalugit siammarterneqarlutik.

Inuit 308-t misissuinermit peqataapput. Akissutit suaassutsinut agguataarneqarneranni arnat 60%-iupput angutillu 40%-iullutik. Peqataasut nukarlersaat 16-inik ukioqarpoq, ukioqqortunerpaarluni 77-inik ukioqarluni, peqataasut agguaqatigiissillugu 48-nik ukioqarput. Peqataasut kommuninit tallimanit tamanit peqataapput, illoqarfinit tamanit akissuteqartoqarluni, tamatumalu saniatigut sumiiffiinnit mikinerusunit arlalinnit aamma peqataasoqarluni. Akissutit amerlanersaat Nuumminngaanneersuupput.

Ammasumik apeqqutinit akissutit sammisakkaarlugit misissoqqissaarneqarput, misigisimasani assigiissutit aamma ernumassutit iliuuseqarfigineqarnerinut periutsit nassaarisinnaajumallugit. Paasissutissat kisitsisinut tunngasut eqqarsartaatsikkut atugarliornerup, inuunermik iluarisimaarinninnerup aamma ernumassutit pisarnerat nassuiarsinnaajumallugu kisitsisitigut misissoqqissaarneqarput. Missuinermi inerniliussat aammattaaq 2018-imi Innuttaasut peqqissusiannik misissuinermit inerniliussanut, aamma innuttaasut peqqissusiannik misissuinermit 2025-mit maanna ingerlanneqartumit inerniliussanut katersorneqartunut sanilliunneqarput.



Misissuinermi inerniliussat misissuinermi killilersuutit eqqarsaatigalugit isigineqassaaq. Akissutit amerlanerit Nuuminngaanneersuunerat erseqqippoq, taamaattumik misissuineq nuna tamaat sinnerlugu misissuinerlut isigineqarsinnaangilaq, taamaattoq kommuninit tamanit aamma sumiiffinnit mikinerusunit amerlasuunit peqataasoqarpoq. Akissutit amerlasuut Nuuminngaanneernerannut innuttaasut amerlasuut illoqarfiit pingaarnersaanni najugaqarnerannut soorunami atassuteqarpoq. Kisianni aamma inuit Nuummiittut nunani tamalaani akkerliissuteqarnermut qaninnerusutut misigisimasimasinnaanerit apeqqutaasimasinnaavoq, politikikkut aalajangiinerit aamma nunanit tamalaaneersunit tikeraarneqarnerit amerlasuutigit illoqarfiit pingaarnersaanni pisarmata. Aammattaaq pisumi ernumassuteqarnerpaat, imaluunniit sunnersimaneqarnerpaat apeqqutinik akisassanik akissuteqarnissaminnik toqqaasut amerlanerunerat misissuinermi inerniliussanut sunniuteqarsinnaavoq.

Misissuineq Innuttaasut peqqissusiannik misissuineq 2024-2026-p ilaatut Kalaallit Nunaanni Ilisimatusarnermi ileqqorissaarnissamut ataatsimiititaliamit akuerineqarpoq. Peqataaneq kajumissutsimik tunngaveqarpoq, aamma paasissutissat tamarmik paasissutissat illersorneqarnissaat pillugu malittarisassat naapertorlugit mianeralugit suliarineqarlutik. Misissuineq Naalakkersuisut ilisimatusarnermut periusissiaannut, piffissami immikkut tatisimaneqarfiusumi aamma annertuumik nalorninartorsiorfiusumi innuttaasut isumaasa tusarniarneqarnerisigit, tapertaavoq.

[1] <https://da.uni.gl/forskning/befolkningsundersogelsen-2024-2026/>

[2] [https://bank.stat.gl/pxweb/da/Greenland/Greenland\\_BE\\_BE01\\_BE0120/BEXSTA.px/table/tableViewLayout1/](https://bank.stat.gl/pxweb/da/Greenland/Greenland_BE_BE01_BE0120/BEXSTA.px/table/tableViewLayout1/)

